

25 AUG 2002

Perjalanan-Kemerdekaan

15,000 PESERTA CUBA CIPTA REKOD JALAN TANPA HENTI 560KM

MELAKA, 25 Ogos (Bernama) -- Seramai 15,000 orang membuat percubaan mencipta rekod Perjalanan Kemerdekaan Berpasukan Tanpa Henti dari Melaka ke Putrajaya, sejauh 560 kilometer, bermula awal pagi ini.

Sejumlah 1,000 daripada mereka yang dibahagikan kepada beberapa kumpulan, dilepaskan di hadapan Memorial Pengisytiharan Kemerdekaan di Bandar Hilir di sini dan menjelajahi negeri Melaka sebelum disambung beberapa kumpulan lain secara berperingkat di Negeri Sembilan dan Selangor.

Pegawai Media Perjalanan Kemerdekaan 2002, Saiful Bahar Mohamed Arshad berkata kumpulan terakhir dijangka tiba di Dataran Putra, Putrajaya pada pukul 10 malam, 29 Ogos ini.

Perjalanan itu bertemakan "Di Atas Runtuhan Kota Melaka Kita Dirikan Putrajaya", sajak yang ditulis Perdana Menteri Datuk Seri Dr Mahathir Mohamad pada sambutan kemerdekaan tahun lepas.

Ia anjuran Biro Tata Negara (BTN), Jabatan Perdana Menteri dan kumpulan pertama dilepaskan Ketua Menteri Datuk Seri Mohamed Ali Rustam pukul 1 pagi ini.

Turut hadir ialah Ketua Setiausaha Negara Tan Sri Samsudin Osman, Setiausaha Kerajaan Negeri Datuk Jahaya Mat dan wakil Malaysia Book of Records Penolong Pengurus Besar Irene Liang.

Saiful Bahar berkata Dr Mahathir dijangka akan menyambut para peserta perjalanan, yang dianggarkan memakan masa selama 118 jam itu, di Putrajaya.

"Dr Mahathir sendiri dijangka akan membacakan satu lagi sajak terbarunya pada malam sambutan itu nanti," katanya.

Perjalanan Kemerdekaan 2002 telah diadakan di semua negeri mulai 12 Ogos lepas dan peserta perjalanan berkumpul di Melaka malam tadi dan akan menyudahkan perjalanan tanpa henti ke Putrajaya.

Sementara itu Mohamed Ali dalam ucapan semasa melepaskan kumpulan pertama perjalanan itu berkata golongan muda patut belajar dari sejarah negara termasuk zaman Kesultanan Melayu Melaka dalam membina sebuah negara yang berjaya dan berdaulat.

Generasi muda perlu mempertahankan kemerdekaan yang ada dan sentiasa bersama pemimpin negara untuk terus menyokong dan membangunkan Malaysia, katanya.

Samsudin pula berkata rakyat negara ini perlu memastikan kemerdekaan yang dikecapi sekarang dipelihara dengan baik dan memastikan negara tidak dijajah semula.

"Tidak ada sesiapa pun di kalangan rakyat negara ini mahu melihat Jalur Gemilang diturunkan, kerana apabila ia diturunkan buat kali kedua, sudah pasti ia amat sukar untuk dikibarkan semula," katanya.

-- BERNAMA

SBS RON